

第三九二册

明倫彙編

人事典

遇合部

感應部

利害部

禍福部

疾病部

生死部

吉凶部

九

(卷)

八

七

三

二

一

古今圖書集成

中華書局影印

圖書集成
彙編
刑名典
卷一百一十五

刑名典

一

刑名典

古今圖書集成

中華書局出版

欽定古今圖書集成明倫彙編人事典

第七十九卷目錄

遇合部藝文三

七徵

演連珠

九愍

元居釋

抵疑

元守論

釋勸論

客傲

對儒

釋時論

權論

七命

感士不遇賦

感知己賦

惜士不遇賦

懷賢賦

晉陸機

前人

陸雲

束皙

夏侯湛

皇甫謐

前人

郭璞

曹毗

王沉

張載

張協

陶潛

梁陸倕

明伍瑞隆

郭秉

人事典第七十九卷

遇合部藝文三

七徵

晉陸機

元虛子耽性冲素雍容元泊棄時俗而弗徇甘漁釣於一壑乃有通微大夫怨皇居之失寶傷鴻誓之後聞策元黃於榛險憑穴巖而放言通微大夫曰奇膳玉食窮滋致豐簡儀羽族考牲毛宗俯出沈鮪仰落歸鴻剖柔胎於孕豹宰潛肝乎餐龍拾朝陽之遺卵納丹穴之飛鳳神宰奇稔嘉禾之穗含滋發馨素類玉銳灼若皓雪之頰元雲皎若明珠之積縑匪素蟻踊而澆濟滋芬溢而相微味雖濃而弗爽氣既惠而復奇介景福於眉壽裕溫克乎齊聖子能養之乎通微大夫曰豐居華殿奇構磊落萬宇雲覆千楹林錯仰綏瑰木俯積璆石敷延袤之廣廡矯凌霄之高閣秀清暉乎雲表騰藻陰之奕奕珍觀清榭岳立連行雲階飛陛仰陟穹蒼聳浮柱而虬立施飛檐以龍翔回房旋室綴珠襲玉圖書神仙延祐承福懸閣高達長廊迴屬於是登漸臺理俊音鏡元止望長林逐狡獸弋輕禽覽壯藝以悅觀聆和樂而怡心子能居之乎通微大夫曰金石諸而齊響填笳協而和鳴於是才人進羽籥元弁被藻襲俯綦領以鴻歸仰矯首而鶴立激長歌於丹唇發鏗鏘乎柔木合清商以絕節揮流徵而赴曲奏南荊之高歎詠易水之清角爾乃觀蛾眉之羣麗容既都而又閑矯纖腰以逐節頓皓足於鼓盤舒妍暉以妖韶若陵危之未安通微大夫曰蓋聞洙北有采唐之思淇上有送子之歎關雎以寤寐為感漆洧以諛浪為歡若夫妖嬈豔女蒐羣擢

俊穆漢儀於令表茂當年之柔嬈罄妍規之約綽體每變而增閑秀芳蕤其愉愉若餘穎之可餐若夫靈

聲潛祖顏退羽觴升清琴厲因清明以宣誠流微聯而授愛纖手揮而鳴佩堅華於被則芳塵萃于其納

之乎通微大夫曰塗有殊而一致業有殊而各約各因委以效績期奇響於天人也孰與顯奇蹤於萬邦

撫六轡而高遊瞰八字以據躬齊清風乎諸侯言成否泰氣作溫涼弭侵略于強暴綵墜紀乎危邦子豈

不願斯之雍容乎通微大夫曰明主應期撫民以德配仁風於黃唐齊威靈乎宸極齊倫幸序庶績咸又

盪流風於雍俗給天民乎齊泰是以元靈感而表應嘉神繁而畢觀舞唐庭之來儀鳴岐陽之鸞駕應天

監之休命荷神聽之介福然聖主達持盈之實術寤經國之在賢各畢榮於分局期贊化於大鈞吾子豈

不欲縻好爵於天宇顯列業乎帝臣歟元虛子作而言曰甚哉鄙人之惑也猶窮繩自逸于井幹憑河盜

本于黃川欽至論敷敝衽謹聞命於王孫

演連珠

前人

臣聞應物有方居難則易藏器在身所乏者時是以

充堂之芳非幽蘭所難繞梁之音實繁絃所思

臣聞智周通塞不為時窮才經夷險不為世屈是以

凌颶之羽不求反風曜夜之目不思倒日

臣聞利眼臨雲不能垂照朗瑗蒙垢不能吐曜是以

明哲之君時有蔽壅之累俊乂之臣屢抱後時之悲

臣聞因雲灑潤則芬澤易流乘風載響則音微自遠

是以德教俟物而濟榮名緣時而顯

臣聞絕節高唱非凡耳所悲肆義芳訊非庸聽所善

明倫彙編人事典第七十九卷遇合部

第三九二冊 之 一 葉

是以南荆有寡和之歌東野有不釋之辯

臣聞飛轡西頓則離朱與滕收察懸景東秀則夜光與賦佚匿曜是以才換世則俱因功偶時而並劬

九愍 陸雲

昔屈原放逐而離騷之詞興自今及古文雅之士莫不以其情而玩其詞而表意焉遂屬作者之末而述九愍

裔皇聖之豐祐膺萬乘之多福真龍暉以底載啓元辰而誕育考度中以錫命端嘉令而自肅蘭情覆以芬香瓊懷皎其如玉希千載以遙想起遠思而自怡範方地而式矩儀穹天而承規結丹款於璇璣協朱誠于四時咨中心之信修佩日月以爲旗悲年歲之晚暮殉修名而競心仰動華之耿暉詠三辟之遐音握遺芳而自玩挹浩露於蘭林陰雲紛以興靄颺風起而回波黨朋淫以惡美疾傾宮之揚娥樹椒蘭於瑤圃掩夜光于瓊華遺貞心以誰貳毀玉質而蒙瑕甘莠言而棄予忽遐放其若遺瞻前軌而我先顧後乘而駕遲遵荒塗而伏軾撫鳴鑾而稱悲感瞻鳥之有集嗟離雁之焉歸靜沉思以自瘁頤凌雲而高飛

修身

逢天怒而離紛遭時咎于惟塵端周誠以恪居祗後命而自寅悲讖口之罔極隔離情于參辰豈三錫之又睇乃裔予於遐賔運羽權以涉江浮鄂渚而駕言背夏首以窘逝今沂行川而永嘆結風回而薄水兮源波縈而重瀾情懷眷以疊結舟淹流而中盤起愁心以自邁蕭榜人而會謳詔河馮以清川命湘娥而安流濟南詔以佇望野蕭條而振嘯悲號以命侶

鳥狂顧而鳴仇悲我行之悠悠怨同懷之莫求發辰陽而往彼緣湘沉而來假亦芳樹於縣車秣梁苗于樊馬山嵩高以藏景雲掩靄而荒野鳥拊翼于薨巔水回波于字下指明星以脈路景即陰而無旅隨長川以問津響修聲而和予聽歸音以自問賤無跡以窮處雖遭愍之既多亦頗沛其何悔仰衆芳之遺情希絕風之延佇亂曰有鳥翻飛集江湘兮彼美一人莫予將兮念茲涉江懷故鄉兮生日何短感日長兮顧我愁景惟永傷兮

涉江

原本闕六字 積沉毒於苦心魂憑虛以飄蕩形思景于重陰虎鳴颺以拂谷嶠回雲而結林操土音以懷鄧涕頻代而盈襟辭終古之舊墟託茲邦而遙集望龍門而屢顧攀惟桑而抵泣悲愁心之難狀振枯形而獨立撫彫容之日頽怊惘思而弗及聞先黎之達教固積善於遺慶晞明休而受言想介福之保定靡心貞以祗服派大順而委命君在初之嘉惠每成言而永日怨谷風之攸歎彌九齡而未徹顧自獻於承間悲黨人之造膝舒幽情其曷訴卷永懷而淹恤嗟哲士之足歎傷邦家之殄瘁痛靈修之匪懷頹九成于一贊忘大寶之勿假輕挈瓶之守器仰剪鬪于凌霄俯歸飛于增尉毀方城于秦川投江漢于泥涓悲彼黍之在郢悼宗楚之莫飭撫傷心以哀告將斯情之孰慰

悲郢

登高山以遐望念悠處之淹流豈大川之難濟悲利涉之莫由申修誠以砥節反內鑒而自求考余心其

焉可往稽度于神謀訪斯言以卜居想貞龜以告猷將矯翼而塗險思振清而世濁羌釋笑而評子諒不疑其何卜朝彈冠以晞髮夕振裳而濯足有懷沙以赴淵無抱素而蒙辱愁纏綿以宅心長歎息而飲淚步江潭以彷徨行吟而含悴遇漁父之反止與譴言而來憩雖懷芳而握瑜懼輕塵之我穢顧虛景而端形矧同波於俱醉迨伊人之逍遙聊仰葉于林側懷達心以遠寤怡衰頹而表色仰班荆之遺情想嘉訊而良食若有言而未吐忽棄予而凌波揮龍榜以鼓汰遺芬響而清歌俟滄浪之濯纓悲余壽之幾何愧福心之嘆淪恨爾謂之莫和捐江魚之言志營元寢于汨羅荷懷忠而死節豈有生之足嘉

行吟

悲怨思之多感情惆悵而遠慕世元黃而既淪心居貞而抱素冀斯氣之一清要佳人于天路考年載以遲之悲歲律之已暮攬豐草於朝日思先晞于湛露規法圖而天象矩則方於地形祇信順以自範邀式數于神聽悲登魂之無抗訊貞夢而通靈悔抱道而懷顧悲實蕃之已盈頓椒丘而息駕振初服而翺翔結瓊蕤之芳襟襲凌華之藻裳懷瑤林之珍秀握蘭野之芳香命坐咸以啓期訪百神而考祥靖永言以聽命欽靈諱而肅邁振華冕之玉藻樹象軒之高蓋鸞假翼以鳴和寬揮景而繁旂芳塵穆以烟燭彤雲起而深蕩游八極以大觀解飛轡以長想將結軌而世狹願援梅而川廣雖我服之方壯思振策其安往舒遠懷以再節賽世羅於天網亂曰倚倚芳草植山阿兮朝日來照發豐華兮秋風蕭瑟疑霜加兮傾葉

懷春猶俟河兮

紆思

徧周流而無過悲窮思之永久聽幽荒而罔詒春寥廓而無友沉流液于繩樞逝回颺于堯廟呼寂寞而靡應攬虛無其何有神悠悠而永念憂綢繆而盈室哀惻心而響起時棄予而景逸招逝運其難徵儀遺範而無律雖芳林之將焚豈蘭馨之可謫唏微風于曠野思同芬而靡質命險太其靡常道離隆而匪易紆幽情而思古援在昔而立辟俟重華以同遊悲瑤圃之難適舟登陸其焉濟輪涉淵而無迹悲荒塗之既外臨遵渚而投策欲隨波以周流恨匪石之難頹將從風而卷舒悲直矢之辭懷貞朗志而玉折厲勁心而蘭摧喟我懷以寤歎闢前鑒而自融忠與邪其莫可豈余命之所窮俯投述而世冷仰晞志而道隆恥蒙垢于同塵思振袂于別風明爽心以畢志考吾道以自終

考志

天機偏其挺蓋玉衡運而同襄景彌修而日短時愈促而夜長和音變而改律乘風華而為商感秋林之風暮悲芳草之中霜存倏忽而風邁逝揮霍而雲散方輕姦而炯遲比收電而景宴將愉樂以夙興迨良日於昧旦痛予生之不辰逢此世之多難將謁藹而未覲世渾渾其難澄風賴山以離谷波平淵而為陵道曠世而朴散化固滯而物凝恨輜德以莫舉悲民鮮之孰勝景照明以妙見音振響而據聞金洋堅以示斷世靡質而效芬馨貞規以殉節反蒙謫于朋羣咨小心以惴惴悲江草之芸芸亂曰浮雲掩靄天明

息今增羅重設鳳矯翼兮梧桐逝矣樹榛棘兮思我芳林喟嘆息兮

感逝

哀時命之險薄懷斯類以結憂手拊膺而未嘆形顧景而長愁生邁年而有盡居靜言其何須將輕舉以遠覽眇天路而高遊結垂雲之翠虬駕琬琰之玉輿揮采旄以烟指靡華旌而電舒命日月以清天吾將遊乎九閭命屏翳以夕降式飛廉以朝興塗蒙雨而後清景景暉而先登陪湘妃于雕閣列漢女以後乘瓊娥起而清嘯神風穆其來應聯悲雲而響駭馳噓天而景凌望紫微以振策躡太階而遂升飛蓋之翼翼回雲車之轆轤朝總轡于扶桑夕飲馬於天津伐河鼓以解徵迄崑崙而凱振軌凌虛而遺跡塵蒙颺而絕輪豈遠遊之無樂懷故都而傷情靡龍首以還顧轉瑤衡而回繁沚凱風以流盼悲舊邦之穢傾脊南雲以典悲蒙東雨而涕零凌百川而絕照仰濯髮于崢嶸豈沈瘁之足弭將蟬蛻于長生

征

痛世路之隘狹詠遂古而長悲鏡端形於三接照直影于太微祇中懷以眷暮豈憂昧而忘歸悼天朝之遂晦構貝錦於繁文侈南箕以鼓物藹青陽而播芬跡同塵而壤絕景和光而天分俯順息於繁波仰頹嘆而崩雲折若華以翳日時靡靡而難停餐秋菊以却老年冉冉其既盈欲假翼以天飛怨曾鳳之我經思故鱗以遁迢悲沈網之在淵有河清而志得挫千載之長年擠哀響於頹風寓悲音於絕絃嗟有生之必死固逸我以自休彼達人之遺物甘寒裳而赴流

矧余情之沉毒資有生以速憂悼居世其何惑固形存其為尤想百年之促期悲樂少而難多修與短其足委曷久沉於汨羅投瀾澗而負石涉清湘以懷沙臨恆流而自墜蒙溶壑之隆波接申胥於南江

於字二鼓層雲以攜手仰接景而登遐

元居釋

晉東哲

東哲閒居門人竝持方下帷深譚隱機而哈含毫散藻考撰同異在側者進而問之曰蓋聞道向變通達者無窮世亂則救其紛時泰則扶其隆振天難以贊百務熙帝載而鼓皇風生則率土樂其存死則宇內哀其終是以君子屈已伸道不恥于時上國有不索何獲之言周易著躍以求進之辭幸老負金鉉以陳烹割之說齊客當康衢而詠白水之詩今先生耽道修藝凝然山峙潛朗通微洽覽深識夜兼忘寐之勤晝聘鑽元之思曠年累稔不墜其志麟翼成而愈伏術業優而不試乃欲闔閭辭價沉蟠深處永耿琳琅之耀匿首窮魚之渚當唐年而慕長沮沮邦有道而反簞武識彼迷此愚竊不取若乃士以援登進必待求附藝之黨橫擢則林數之彥不抽丹墀芳綺袴之童東野遺白顛之叟蓋亦因子都而事博陸憑鶴首以涉洪流蹈翠雲以駭逸龍振光耀以驚沈鯨徒屈蟠於培井眇天路而不遊學既種而身困夫何為乎祕丘且歲不我與時若奔駟有來無反難得易失先生不知吁豫之識悔遲而忘夫朋盍之義務疾亦豈能登海涓而仰東流之水臨虞泉而招西歸之日徒以曲畏為楷儒學自枉因大道於環堵苦形骸于蓬室豈能託身權威憑勢假力擇棲芳林飛不待翼夕宿

七娥之房朝享五鼎之食匡三正則太階平贊五教而玉繩直執若茹藿餐蔬終身以匿哉東子曰居吾將導爾以君子之道論爾以出處之事爾其明受余訓謹聽余志昔元一既啓兩儀肇立離光夜隱望舒晝戢羽族翔林歷蛇赴濕物從性之所安士樂志之所執或背豐榮以巖棲或排蘭闥而求入在野者龍逸在朝者鳳集雖其軌迹不同而道無貴賤必安其業交而相美稷契奮庸以宣道巢由洗耳以避禪同垂不朽之稱俱入賢者之流參名比譽誰劣誰優何必貪與一八爲羣而恥爲七人之疇乎且道賤而遁士不同趣吾竊綴處者之末行未敢聞子之高喻將忽蒲輪而不眇夫何權戚之云附哉昔周漢中衰時難自託福兆既開患端亦作朝遊魏襄之宮夕墜崢嶸之壑晝笑夜歎晨華暮落忠不足以衛己禍不可以預度是士諱登朝而競赴臨薄或毀名自污或不食其祿比從政于匣笥之龜譬官者於郊廟之饋公孫泣涕而辭相揚雄抗論於赤族今大晉熙隆六合寧靜蜂蠆止毒熊羆輟猛五刑勿用八紘備整主無驕肆之怒臣無蹙纓之請上下相安率禮從道朝養觸邪之獸庭有指佞之草禍戮可以忠逃寵祿可以順保且夫進無險懼而惟寂之務者率其性也兩可俱是而舍彼趣此者從其志也蓋無爲可以解天下之紛澹泊可以救國家之急當位者事有所窮陳策者言有不入翟璜不能迴西鄰之寇平勃不能正如意之立干木臥而秦師退四皓起而戚姬泣夫如是何舍何執何去何就謂山岑之林爲芳谷底之莽爲臭守分任可唯天所授烏不假甲於龜魚不假足於

獸何必笑孤竹之貧而求齊景之富恥布衣以肆志寧文裘而拖繡且能約其躬則儋石之糈以豐苟肆其欲則海陵之積不足存道德者則匹夫之身可榮忘大倫者則萬乘之主猶辱將研六籍以訓世守寂泊以鎮俗偶鄭老於海隅匹嚴叟於僻蜀且世以太虛爲與元儲爲肆神游莫競之林心存無營之室榮利不擾其覺殷憂不干其寐捐夸者之所食收賸務之所棄雖聖籍之荒蕪總羣言之一至全素履於丘園背纓綬而長逸請子課吾業於千載無聽吾言於今日也

抵疑

夏侯湛

當路子有疑夏侯湛者而謂之曰吾聞有其才而不遇者時也有其時而不遇者命也吾子童幼而岐嶷弱冠而著德少而流聲長而垂名拔萃始立而登宰相之朝揮翼初儀而受卿尹之舉盪典籍之華談先王之言入闔閭躡丹墀染彤管吐洪輝千當世之務觸人主之威有效矣而官不過散郎舉不過賢良鳳樓五期龍蟠六年英耀禿落羽儀摧殘而獨離容藝文蕩貽儒林志不輟著述之業口不釋雅頌之音徒費精而耗力勞神而苦心此術亦已薄矣而終莫之辯宜吾子之陸沈也且以言乎才則吾子優矣以言乎時則子之所與二三公者義則骨肉之固交則明道之觀也富于德貴于官其所發明雖叩牛操築之客備賃抱關之隸負俗懷讓之士猶將登爲大夫顯爲卿尹於何有寶咳唾之音愛鑑珠之力向若垂一鱗同一翼令吾子振其飛騰之勢挂其羽翼之末猶奮迅於雲霄之際騰驤于四極之外今乃金口玉音

漠然沉默使吾子棲遲窮巷守此困極心有窮志貌有飢色客江河之流不以濯舟船之畔惜東壁之光不以寓貧婦之目抑非二三公之蔽賢也實吾子之拙惑也夏侯子曰噫湛也幸有過人必知之矣吾子所以褒飾之大矣斟酌之驗非小醜之所堪也然過承古人之誨抑因子大夫之忝在敝室也敢布其腹心豈能隱几以覽其槩乎客曰敢祇以聽夏侯子曰吾聞先大夫孔聖之言德之不修學之不講聞義不能徙不善不能改是吾憂也四德具而名位不至者非吾任也是以君子求諸己小人求諸人僕也承門戶之業受過庭之訓是以得接冠帶之末充乎士大夫之列頗闕六經之文覽百家之學弱年而入公朝蒙蔽而當顯舉進不能拔羣出萃却不能抗排當世志則乍顯乍昧文則乍幽乍蔚矧之者則謂之欲道遙以養生不知之者則謂之欲遯遯以求遠此皆未是僕之所置也僕又聞世有道則士無所執其節黜陟明則下不在量其力是以當舉而不辭入朝而酬問僕東野之鄙人頑直之陋生也不識當世之便不達朝廷之情不能依靡容悅出入崎嶇逐巧點妍嘔囁辭佞隨羣班之大伏簡墨之後當此之時若失水之魚喪家之狗行不勝衣言不出口安能干當世之務觸人主之威適足以露狂簡而增塵垢縱使心有至言言有偏直此委巷之誠非朝廷之欲也今天子以茂德臨天下以八方六合爲四境海內無虞萬國元靜九夷之從王化猶洪聲之收清響黎苗之樂函夏若遊形之招惠景鄴曲之徒一介之士曾諷急就習甲子者皆奮筆揚文議制論道出草茅起林藪御

青瑣入金墉者無日不有充三臺之寺盈中書之閣有司不能竟其文當年不能編其籍此執政之所厭聞也若乃羣公百辟卿士常伯被朱佩紫耀金帶白坐而論道者又充路盈寢黃幄玉階之內飽其尺牘矣若僕之言皆糞土之說消磨灰爛垢辱招穢適可充衛士之糞盈掃除之器譬猶投盈寸之膠而欲使江海易色燒一羽之毛而欲令大鑪增勢若燎原之烟彌天之雲噓之不益其熱噏之不減其氣今子見僕入朝覽對便欲坐望高位吐言數百便謂陵喻一世何吾子之失評也僕固脂車以須放秣馬以待却反耕於枳落歸志乎澗瀨從容乎農夫優游乎卒歲矣古者天子畫土以封羣后羣后受國以臨其邦懸大賞以樂其成列九伐以討其違與衰相形安危相傾故在位者以求賢爲務受任者以進才爲急今也則九州爲一家萬國爲百郡政有常道法有恆訓因循而禮樂自定揖讓而天下大順夫道學之貴游閭邑之搢紳皆高門之子世臣之裔弘風長舉推成而進悠悠者皆天下之彥也諷詠訓傳詩書講儒墨說元虛僕皆不如也二三公之簡僕於凡庸之肆顯僕於細猥之中則爲功也重矣時而清談則爲親也周矣且古之君子不知士則不明不安是以居逸而思危對食而看乾今也則否居位者以善身爲靜以寡交爲慎以弱斷爲重以怯言爲信不知士者無公誹不得士者不私愧彼在位者皆稷契咎益伊呂周召之倫叔豹仲熊之儔稽古則踰黃唐經緯則越虞夏蔑昆吾之功噬桓文之勳抵抵管仲蹉跎晏嬰遠升鼎湖近超太平方將保重齋神獨善其身元白冲虛

化爾養眞雖力挾泰山將不舉一羽揚波萬里將不濯一鱗吟睡成珠玉揮袂出風雲豈肯撇鄙事取才進人此又吾子之失言也子獨不聞夫神人乎噏風飲露不食五穀登太清遊山岳靡芝草弄白玉不因而獨備無假而自足不與人路同嗜欲不與世務齊榮辱故能入無窮之門享不死之年以此言之何待進賢客曰聖人有言曰邦有道貧且賤焉恥也今子值有道之世當太平之會不攘袂奮氣發謀出奇使鳴鶴受和好爵見麻抑乃沈身郎署約志勤卑不亦羸哉且伊尹之干成湯審威之迂桓公或投己鼎組或庸身飯牛明廢興之機歌白水之流德入殷王義感齊侯故伊尹起庖廚而登阿衡審威下車而下階大夫外無微介內無請謁矯身擢手徑躡名位吾子亦何不慕賢以自厲希古以慷慨乎夏侯子曰嗚呼是何言歟富與貴是人之所欲非僕之所惡也夫千將之劍斷斷狗馬水截蛟龍而鉛刀不能入泥駢驥驂驪之乘一日而致千里而駑蹇不能過畝百鍊之鑑別鬚眉之數而壁土不見秦山鴻鶴一舉橫四海之區出青雲之外而尺鷃不陵桑榆此利鈍之較優劣之決也夫欲進其身者不過千萬乘而僕已上朝堂答世問不過顯所知而僕已竭心思盡才學意無雅正可準論無片言可採是以頓於鄙劣而莫之能起也以此言之僕何爲其不自銜哉子不嫌僕德之不劬而疑其位之不到是猶反鏡而索照登木而下釣僕未以此爲不肖也若乃伊尹負鼎以干湯呂尚隱遊以微文傳說操築以席主密威擊角以要君此非僕所能也莊周貽蕩以放言君平賣卜以自賢

接輿陽狂以蔽身梅福棄家以求仙又非僕之所安也若乃季札抗節于延陵揚雄覃思于太元伯玉和柔於仕懷柳惠三黜於士官僕雖不敏竊願彷彿其清塵

元守論

皇甫謐

或謂謐曰富貴人之所欲貧賤人之所惡何故委形待於窮而不變乎且道之所貴者理世也人之所美者及時也先生年邁齒變飢寒不贍轉死溝壑其誰知乎謐曰人之所至惜者命也道之所必全者形也性形所不可犯者疾病也若獲全道以損性命安得去貧賤存所欲哉吾聞食人之祿者懷人之憂形強猶不堪況吾之弱疾乎且貧者士之常賤者道之實處常得實沒齒不憂孰與富貴擾神耗精者乎又生爲人所不知死爲人所不惜至矣暗聾之徒天下之有道者也夫一人死而天下號者以爲損也一人生而四海笑者以爲益也然則號笑非益死損生也是以至道不損至德不益何哉體足也如迴天下之念以追損生之福運四海之心以廣非益之病豈道德之至乎夫唯無損則至堅矣夫唯無益則至厚矣堅故終不損厚故終不薄苟能體堅厚之實居不薄之真立乎損益之外游乎形骸之表則我道全矣

釋勸論

前人

魏郡名士計掾舉孝廉景元初相國辟皆不行其後鄉親勸令應命謐爲釋勸論以通志焉其辭曰相國晉王辟余等三十七人及泰始登禪同命之士莫不畢至皆拜騎都尉或錫爵關內侯進奉朝請禮如侍臣唯余疾困不及國寵宗人父兄及我

寮類咸以爲天下大慶萬民賴之雖未成禮不宜安寢縱其疾篤猶當致身余唯古今明王之制事無巨細斷之以情實力不堪豈慢也哉乃伏枕而嘆曰夫進者身之榮也退者命之實也設余不疾執高箕山尙當客之况余實篤故堯舜之世士或收迹林澤或過門不敢入咎繇之徒兩遂其願者遇時也故朝貴致功之臣野美全志之士彼獨何人哉今聖帝龍興配名前哲仁道不遠斯亦然乎客或以常言見逼或以逆世爲慮余謂上有寬明之主必有聽意之人天網恢恢至否一也何尤於出處哉遂究賓主之論以解難者名曰釋勸

客曰蓋聞天以懸象致明地以含通吐靈故黃鍾大序律呂分形是以春華發萼夏繁其實秋風逐暑冬冰乃結人道以之應機乃發三材連利明若符契故士或同升于唐朝或先覺于有莘或通夢以感主或釋釣于渭濱或叩角以干齊或解褐以相秦或冒謗以安鄭或乘駟以救屯或班荆以求友或借術于黃神故能電飛景拔超邁倫騰高聲以奮遠抗宇宙之清音由此觀之進德貴乎及時何故屈此而不伸今予以英茂之才游精于六藝之府散意于衆妙之門者有年矣既遭皇禪之朝又投祿利之際委聖明之主遇知己之會時清道真可以冲邁此真吾生濯髮雲漢鴻漸之秋也輶光逐藪含章未耀龍潛九泉磬然執高棄通道之遠猷守介人之局操無乃乖於道之趣乎且吾聞招搖昏迴則天位正五教班叙則人理定如今王命切至委慮有司上招迂主之累下致駭衆之疑達者貴同何必獨異羣賢可從何必守

意方今同命並臻饑不待殮振藻皇塗咸秩天官子獨栖遲衡門放形世表逶迤丘園不脫華好惠不加人行不合道身嬰大疾性命難保若其義和促轡大火西頽臨川恨晚將復何階夫貴陰賤壁聖所約也顛倒衣裳明所箴也子其鑒先哲之洪範副聖朝之虛心冲靈翼于雲路浴天池以濯鱗排闥問步玉岑登紫閣侍北辰翻然景耀雜沓英塵輔唐虞之主化堯舜之人宜刑措之政配殷周之臣銘功景鐘泰叙彝倫存則期食亡爲貴臣不亦茂哉而忽金白之輝曜忘青紫之班聯辭服服之光榮抱弊褐之終年無乃勤乎主人笑而應之曰吁若實可謂習外觀之暉暉未覩幽人之髣髴也見俗人之不容未驗聖皇之兼愛也循方圓于規矩未知大形之無外也故曰天元而清地靜而寧含羅萬類旁薄羣生寄身聖世託道之靈若夫春以陽散冬以陰凝泰液含光元氣混蒸衆品仰化誕制殊微故進者享天祿處者安丘陵是以寒暑相推四宿代中陰陽不治運化無窮自然分定兩克厥中二物俱靈是謂大同彼此無怨是謂至通若乃衰周之末貴詐賤誠牽于權力以利要榮故蘇子出而六主合張儀入而橫勢成廉頗存而趙重樂毅去而燕輕公叔沒而魏敗孫臏削而齊寧蠡種親而越霸屈子疎而楚傾是以君無常籍臣無定名損義放誠一虛一盈故馮以彈劍威主女有反賜之說項奮拔山之力蒯陳鼎足之勢東郭劫于田榮顏闔恥于見逼斯皆衆禮喪真荷榮朝夕之急者也豈道化之本歟若乃聖帝之創化也恭德乎二皇齊風乎虞夏復溫溫而和暢不欲察察而明切也欲混

混若源流不欲蕩蕩而名發也欲索索而條解不欲契契而繩結也欲茫茫而無垠不欲區區而分別也欲聞然而內章不欲示白若冰雪也欲醇醇而任德不欲瑣瑣而執法也是以見機者以動成好避者無所迫故曰一明一昧得道之概一弛一張合體之方一浮一沈兼得其真故上有勞謙之愛下有有名之臣朝有聘賢之禮野有遜竄之人是以支伯以幽疾拒唐李老寄跡于西鄰顏氏安陋以成名原思娛道於至貧榮期以三樂戚尼父黔婁定諡於布衾干木偃息以存魏荆萊志邁於江岑君平因著以遁著四皓潛德於洛濱眞躬耕以致魯功安發令乎今人皆持難奪之節執不迴之意遭拔俗之主全彼人之志故有獨定之計者不借謀於衆人守不動之安者不假慮於羣賓故能棄外親之華通內道之眞去顯顯之明路入昧昧之埃塵宛轉萬情之形表排托虛寂以寄身居無事之宅交釋利之人輕若鴻毛重若泥沈損之不得測之愈深眞吾徒之師表余迫疾而不能及者也子議吾失宿而駭衆吾亦怪子較論而不折中也夫才不周用衆所斥也廢疾彌年朝所棄也是以胥克之廢丘明列焉伯牛有疾孔子斯嘆若黃帝創制於九經岐伯剖腹以錫腸扁鵲造號而尸起文摯徇命於齊王醫和顯術於秦晉倉公發祕於漢皇華佗存精於獨識仲景垂妙於定方徒恨生不逢乎若人故乞命訴乎明王求絕編於天錄亮我躬之辛苦冀微誠之降霜故俟罪而窮處

客傲

郭璞

客傲郭生曰玉以兼城爲寶士以知名爲賢明月不

妄映蘭葩豈虛鮮今足下既以拔秀於叢蒼陰弱
根於慶雲凌扶搖而疎翻揮清瀾以濯鱗而響不徹
於九臯價不登于千金傲岸榮悴之際頡頏龍魚之
間進不為諸隱退不為放言無沈冥之韻而希風乎
嚴光徒費思於鑽味辜洞林乎連山尚何名乎夫攀
驪龍之髯撫翠禽之毛者而不得絕震肆跨天津者
未之前聞也郭生粲然而笑曰鶴鶴不可與論雲翼
井蛙難與量海鼃雖然將祛子之惑訊以未悟其可
乎乃者地維中絕乾光墜采星運暫回廊祚淮海龍
德時乘羣才雲駭萬若都林之會逸輪爛若溟海之
納奔濤不煩咨嗟之訪不假蒲帛之招羈九有之奇
駿咸總之于一朝豈惟豐沛之英南陽之豪昆吾挺
鋒驕驕軒輊杞梓競敷蘭蕙爭翹嚶聲冠於伐木援
類繁乎拔茅是以水無浪士巖無幽人刈蘭不暇爨
桂不給安得錯薪乎且夫窟泉之潛不思雲罩壓冰
之采不羨旭暉渾光曜於埃藹者亦曷顧滄浪之深
秋陽之映乎登降紛於九五淪湧懸乎龍津蚓蟻以
不才陸槁蟒蛇以騰鶩暴鱗連城之寶藏於褐裏三
秀雖豔靡於麗采香惡乎芬賈惡乎在是以不塵不
冥不驪不駢支離其神蕭悴其形形廢則神王迹蠹
而名生體全者為犧至獨者不孤傲俗者不得以自
得默覺者不足以涉無故不恢心而形遺不外累而
智喪無巖穴而冥寂無江湖而放浪元悟不以應機
洞鑒不以昭曠不物物我我不是是非非忘意非我
意得意非我懷寄羣籟乎無象域萬殊於一歸不壽
殤子不夭彭涓不壯秋毫不小太山蚊蟲與天地齊
流蜉蝣與大椿齒年然一闔一開兩儀之迹一冲一

溢懸象之節渙近期于寒暑周蔚要乎春秋青陽之
翠秀龍豹之委穎駭狼之長暉元陸之短景故阜壤
為悲欣之府蝴蝶為物化之器矣夫欣黎黃之音者
不聾蟬蛄之吟豁雲臺之觀者必闊帶索之歡縱蹈
而詠採薪擁壁而嘆抱關戰機心以外物不能得意
于一弦悟往復于嗟嘆安可與言樂天者乎若乃莊
周偃蹇于漆園老萊婆娑於林窟嚴平澄漠於塵肆
梅貞隱淪乎市卒梁生吟嘯而矯迹焦先混沌而槁
机阮公昏酣而真傲翟叟逡形以倏忽吾不能幾韻
于數賢故寂然玩此員策與智骨

對儒

曹毗

或問曹子曰夫寶以含珍為貴士以藏器為峻麟以
絕跡標奇松以負霜稱雋是以蘭生幽澗玉輝千仞
故子州浮滄淵而龍蟠吳季忽萬乘以解印虞公潛
崇巖以頤神梁生適南越以保慎故能全真養和夷
迹洞庭陵冬揚芳披雪獨振也今子少晞冥風弱挺
秀容奇發幼齡輪披儒童吐辭則藻落揚班抗心則
志擬高鴻馮味道則理貫莊肆研妙則韻奪豪鋒故以
騰廣莫而萋薄排素薄而青葱者矣何必以刑理為
己任申韓為宏通既登東觀染史筆又據太學理儒
功會無元韻淡泊逸氣虛洞養采幽翳晦明蒙籠不
追林樾之迹不希抱麟之龍不營練真之術不慕內
聽之聰而處汎位以核物扇塵教以自蒙負鹽車以
顯能飾一己以求恭退不居漆園之場出不躡會城
之衝游不踐綽約之室趙不希駭駟之蹤徒以區區
之懷而整名目之典覆質之量而塞北川之洪檢名
實於俄頃之間定得失乎一管之鋒子若謂我果是

耶則是不必以合俗子若云俗果非耶則俗非不可
以苟從俗我紛以交爭利害渾而彌重何異執朽轡
以御逸駟承勁風以握秋蓬役怙姓以充勞府對羣
物以耦怨讎者乎子不聞乎終軍之誦買生之才拔
奇山東玉映漢臺可謂響播六合聲駭嬰孩而見毀
絳灌之口身離狼狽之災由此言之名為實寶福萌
禍胎朝敷榮華夕歸塵埃未若澄虛心于元圃陰瑤
林於蓬萊絕世事而雋黃綺鼓滄川而浪龍鰓者矣
蒙竊惑焉主人煥耳而笑欣然而言曰夫兩儀既闢
陰陽汗浩五才迭用化生紛擾萬類芸芸孰測其兆
故不登閭風安以瞻珠目之形不步景宿何以觀恢
廓之表是以迷粗者循一往之智狷介者守一方之
矯豈知火林之蔚炎柯冰津之擢陽草故大人達觀
任化昏曉出不極勞處不巢皓在儒亦儒在道亦道
運屈則紆其清暉時申則散其龍藻此蓋員動之用
舍非尋常之所寶也今三明互照二氣載宣元教夕
凝朗風晨鮮道以才暢化隨理全故五典魁明于百
揆虞音齊響于五絃安期解褐于秀林漁父罷釣于
長川如斯則化無不答道無不延風澄于俗波清于
川方將舞黃虬于慶雲招儀鳳于靈山流玉體于華
閭秀朱草于庭前何有達理之思累真之嫌子徒知
辨其說而未測其源明朝菌不可踰晦朝蟪蛄無以
觀大年固非管輸之所述聊敬對以終篇

釋時論

王沉

東野丈人觀時以居隱耕汗腹之墟有冰氏之子者
出自沍寒之谷過而問塗丈人日子奚自曰自涸陰
之鄉奚適曰欲適煌煌之堂丈人曰入煌煌之堂者

必有赫赫之光今子困于寒而欲求諸熱無得熱之方冰于瞿然曰胡為其然也丈人曰融融者皆趨熱之士其得爐冶之門者惟挾炭之子苟非斯人不如其已冰子曰吾聞宗廟之器不要華林之木四門之賓何必冠蓋之族前賢有解韋索而佩朱戟舍徒擔而乘丹轂由此言之何恤而無祿惟先生告我塗之速也丈人曰嗚呼子聞得之若是不知時之在彼吾將釋子夫道有安危時有險易才有所應行有所適英奇奮于縱橫之世賢智顯于霸王之初當厄難則聘權譎以良圖值制作則展儒道以暢摠是則袞龍出于縕褐卿相起于匹夫故有朝賤而夕貴先卷而後舒當斯時也豈計門資之高卑論勢位之輕重乎今則不然上聖下明時隆道寧羣后逸豫晏安守平百辟君子奕世相生公門有公卿門有卿指禿腐骨不簡量彈多士豐于貴族爵命不出閭庭四門穆穆綺繡是盈仍叔之子皆為老成賤有常尊貴有常榮肉食繼踵于華屋疏食繫跡于樗枏談名位者以詔媚附勢舉高譽者因資而隨形至乃空譽者以泓唱為雅量瓊慧者以淺利為鎗鎗胎者以無檢為弘曠僂垢者以守意為堅貞嘲咤者以粗發為高亮蠶蠶者以色厚為誠庵焚者以博納為通濟眠眠者以難入為凝清拉答者有沉重之譽賺閃者得清勦之聲嗇嗇怯畏于謙讓聞其勇敢于警諍斯皆寒素之死病榮達之嘉名凡茲流也視其用心察其所安責人必急于己恆寬德無厚而自貴位未高而自尊眼罔響而遠視鼻膠亂而刺天忌惡君子悅媚小人做蔑道素懾吁權門心以利傾智以勢昏姻黨相扇

毀譽交紛當局迷於所受聽探惑於所聞京邑翼異羣士千億奔集勢門求官買職童僕闌其車乘閤寺相其服飾親客陰慘於靖室疏賓徒倚於門側時因接見於厲容色心懷內在外詐剛直譚道義謂之俗生論政刑以為鄙極高會曲宴惟言遷除消息官無大小問是誰力今以子孤寒懷真抱素志凌雲霄偶景獨步直順常道關津難渡欲聘韓盧時無免衆塗圯塞投足何錯於是冰子釋然乃悟曰富貴人之所欲貧賤人之所惡僕少長於孔顏之門久處于清寒之路不謂熱勢自其遮鋼敬承明誨服我初素彈琴詠典以保年祚伯成延陵高節可慕丹較滅族呂霍哀吟朝榮夕滅旦飛暮沉聘周道師巢由德林豐屋蔀家易著明箴人薄位尊積罰難任三卻尸晉宋華谷深投局正幅實獲我心

權論

張載

夫賢人君子將立天下之功成天下之名非遇其時曷由致之哉故嘗試論之殷湯無鳴條之事則伊尹有莘之匹夫也周武無牧野之陣則呂牙渭濱之釣翁也若茲之類不可勝計蓋聲發響應形動影從時平則才伏世亂則才用豈不信歟設使秦莽修三王之法時致隆平則漢祖泗上之健吏光武春陵之俠客耳况乎附麗者哉故當其有事也則足非千里不入于與刃非漸鴻不輟于韜是以驚蹇望風而還頑鈍未試而廢及其無事也則牛驥共牢利鈍齊列而無長塗犀革以決之此離朱與瞽者同眼之說也處守平之世而欲建殊常之勳居太平之際而吐違俗之謀此猶却步而登山驚章甫于越也漢文帝見李

廣而歎曰惜子不遇當高祖時萬戶侯豈足道哉故智無所運其籌勇無所奮其氣則勇怯一也才無所騁其能辯無所展其說則頑慧均也是以吳榜越船不能無水而浮青虬赤螭不能無雲而飛故和璧之在荆山隋珠之潛重川非遇其人焉有連城之價照車之名乎青散繁霜繫於籠中何以效其最東郭于溝下也白援元豹藏於靈樞何以知其接垂條於千仞也犀夫與鳥獲訟力非龍文赤鼎無以明之蓋華政與荆卿爭勇非強秦之威孰能辨之故傲夫庸隸抱關屠釣之倫一旦而都卿相之位建金石之號者或有懷顏孟之術抱伊管之略沒世而不齒者此言有事之世易為功無為之時難為名也若使湮沒而不稱曾不足以多談况夫庸庸之徒少有不得意者則自以為枉伏莫不飾小辯立小善以偶時結朋黨聚虛譽以驅俗進之無補于時退之無損于化而世主相與雷同齊口吹而煦之豈不哀哉今士循常循故規行矩步積階級累閭閻碌碌然以取世資若夫魁梧僬僬卓犖倜儻之徒直將伏死欽岑之下安能與步驟共爭道里乎至如軒輊戴班之士苟不能匡化輔政佐時益世而徒俯仰取容要榮求利厚自豐之資殖私家之積此沐猴而冠耳尚焉足道哉

七命

張協

沖漠公子含華隱耀嘉遯龍蟠超世高蹈遊心于浩然玩志乎衆妙絕景乎大荒之遐阻吞響乎幽山之窮奧于是徇華大夫聞而造焉乃整雲輅駉飛黃越奔沙輓流霜浹扶搖之風躡堅冰之津旌拂青瑤軌出蒼垠天清冷而無霞野曠朗而無塵臨重軸而攬

轡顧石室而迴輪遂適沖漠公子之所居其居也岬嶠幽藹蕭瑟虛元溟海渾渾湧其後嶺谷嶢嶢張其前尋竹疎莖蔭其壑百嶺羣鳴籠其山衝處發而迴日飛磔起而麗天於是登絕嶽迺長風陳辨惑之辭命公子于巖中曰蓋聞聖人不卷道而背時智士不遺身而匿跡生必耀華名于玉牒歿則勒洪伐于金冊今公子達世陸沈避地獨竄有生之權滅資父之義廢慈洽百年苦溢千歲何異促鱗之遊汀潭短羽之棲翳者今將榮子以天人之大寶悅子以縱性之至娛窮地而遊中天而居傾四海之歡輝九州之腴鑽屈轍之瓠解疏屬之拘子欲之乎公子曰大夫不遺來萃荒外雖在不敏敬聽佳話

大夫曰寒山之桐出自太冥含黃鍾以吐翰據蒼岑而孤生既乃瓊嶺峻金岸崢嶸右當風谷左臨雲谿上無凌虛之巢下無跼實之蹊搖則峻挺客邈嶠嵯峨三春之溢露迺九秋之鳴颺零雪寫其根霏霜封其條木既繁而後綠草未素而先凋於是構雲梯陟崢嶸翦蕤賓之陽柯剖大呂之陰莖營匠斷其模伶倫均其聲器舉樂奏促調高張音朗號鐘韻清繞梁追逸響於八風采奇律於歸昌啓中黃之妙宮發靜收之變商若乃龍火西頽暄氣初收飛霜迎節高風送秋羈旅懷土之徒流若百罹之儔撫促柱則酸鼻揮危弦則涕流若乃追清哇赴嚴節奏綠水吐白雲激楚迴流風結悲蕤英之朝落悼望舒之夕缺斨簞爲之擗標孺老爲之鳴咽王子拂纓而傾耳六馬噓天而仰秣此蓋音曲之至妙子豈能從我而聽之乎公子曰余病未能也

大夫曰蘭宮祕宇彤堂綺檻雲屏爛吐瓊壁青葱應門八襲旋臺九重表以百常之闕圍以萬雉之墉兩乃崢嶸迎風秀出中天翠觀翠青形閣霞連長翼臨雲飛陞凌山望玉繩而結極承倒影而開軒賴素炳煥粉棋嵯峨映陰舂檐陽馬承阿錯以瑤英鑄以金華方疏舍秀圓并吐葩重殿疊起交綺對視幽堂畫密明室夜朗焦螟飛而生風尺蠖動而成響若乃日厭常玩體倦帷幄攜公子而雙遊時娛觀于林麓登翠阜臨丹谷華草錦繁飛采星燭陽葉青春陰條秋綠華實代新承意恣觀仰折神葩俯採蘭蘭迴惠風於蘅薄眷椒塗於瑤壇爾乃浮三翼戲中泚潛鯢駭驚輪起沈絳結飛增理挂歸闕於赤霄之表出華鱗於紫潭之裏然後縱櫂隨風弭棹乘波吹孤竹拊雲和淵客唱淮南之曲榜人奏采菱之歌歌曰乘鳧舟兮爲水嬉臨芳洲兮拔雲芝樂以忘戚遊以卒時窮夜爲日畢歲爲期此蓋宴居之浩麗子豈能從我而處之乎公子曰余病未能也

大夫曰若乃白商素節月既授衣天凝地閉風厲霜飛柔條夕勁密葉晨稀將因氣以效殺臨金郊而講師爾乃列輕武整戎剛建雲霓啓雄芒駕紅陽之飛燕驂唐公之驢駟屯羽除於外林縱輕翼於中荒爾乃張脩毘布飛羅陵黃翠挂青轡畫長壑以爲限帶流谿以爲關既乃內無疏蹊外無漏籍叩鉦數技舉麾旌獲穀金機馳鳴鏑前馳落勁勒車騎競騖駢武齊轍翕忽揮霍雲迴風烈聲動響飛形移景發舉戈林疎揮鋒電滅仰傾雲葉俯殫地穴乃有圓文之狎斑題之猋鼓鬣風生怒目電睨口敝霜刃足撥飛

鋒航林厥石扣拔幽叢於是飛黃奮銳賁育逞伎盛封狝攢馮豕拉彪離挂解馬句爪摧鋸牙掉瀾漫狼藉傾榛倒壑頽崗挂山偃路掩澤數爲毛林隱爲丹薄於是撒圍頓罔卷旆收爲虞人數獸林衡計鮮論最犒勳息馬輶茲有駟連鑣酒駕方軒千鍾電醵萬燧星繁陵阜雷流青溪谷厭芳烟歊極樂彈節而旋此亦敗遊之壯觀子豈能從我而爲之乎公子曰余病未能也

大夫曰楚之陽劍歐冶所營邪谿之鉞赤山之精銷踰羊頭鑊越鍛成乃鍊乃鏤萬辟千灌豐隆奮椎飛廉扇炭神器化成陽文陰縵既乃流綺星連浮影麗發光如散電質如耀雪霜鏤水凝冰刃露潔形冠豪曹名珍巨闕指鄭則三軍白首麾晉則千里流血豈徒水截蛟龍陸灑奔駟斷浮翮以爲工絕重甲而稱利云爾而已哉若其靈寶則舒辟無方奇鋒異模形震薛燭光駭風胡價兼三鄉聲貴二都或馳名傾泰或夜飛去吳是以功冠萬載威曜無窮揮之者無前擁之者身雄可以從服九國橫制八戎爪牙景附函夏承風此蓋希世之神兵子豈能從我而服之乎公子曰余病未能也

大夫曰天驥之駿逸超越越稟氣靈潤受精皎月眸翺黑照元采紺發沫如揮紅汗如振血秦青不能識其衆尺方孰不能觀其若滅爾乃中雲軒踐朝暮赴春衢整秋御蚪躡騰騰騰超龍翥望山載奔視林載赴氣盛怒發星飛電駭志陵九州勢越四海影不及形塵不暇起浮箭未移再踐千里爾乃踰天垠越地隔過汗漫之所不遊躡章亥之所未跡陽鳥爲之頓

羽夸父爲之投策斯蓋天下之偶乘子豈能從我而御之乎公子曰余病未能也

大夫曰大梁之黍瓊山之禾唐稷播其根農帝嘗其華爾乃六禽殊珍四饈異有窮海之錯極陸之毛伊公舉鼎庖丁揮刀味重九沸和兼勻藥晨晷露鴛霜鷄黃雀圖按星亂方丈華錯封熊之躡翰音之跼驚騁程臂毫殘象白靈淵之龜萊黃之鮐丹穴之鸚元豹之胎輝以秋橙酷以春梅接以商王之著承以帝辛之杯范公之鱗出自九溪賴尾丹鯁紫翼青鬚爾乃命支離飛霜錫紅肌綺散素膚雪落婁子之毫不能刪其細秋蟬之翼不足擬其薄驚有既閱亦有嘉羞商山之果漢草之榛析龍眼之房剖椰子之殼芳旨萬選承意代奏乃有荆南烏程豫北竹葉浮蟻星沸飛華并接元石嘗其味儀氏進其法傾壘一朝可以流湔千日單醪投川可使三軍告捷斯人神之所欣羨觀聽之所煒燭也子豈能強起而御之乎公子曰耽爽口之饌甘腊毒之味服腐腸之藥御亡國之器雖子大夫之所榮顧亦吾人之所畏余病未能也大夫曰蓋有晉之融皇風也金華啓微大人有作繼明代照配天光宅其基德也陸于姬公之處岐其垂仁也富乎有殷之在亳南箕之風不能暢其化離畢之雲無以豐其澤皇道煥炳帝載緝熙導氣以樂宣德以詩教清於雲官之世政穆乎鳥紀之時王猷四塞函夏謐靜丹冥投烽青微釋警却馬於糞車之轅銘德於昆吾之鼎羣氓反素時人載郁耕父推泮漁暨讓陸樵夫恥危冠之飾與臺笑短後之服六合時雍巍巍蕩蕩元碧巷歌黃髮擊壤解義皇之繩指陶

唐之象若乃華裔之夷流荒之貊語不傳於輶軒地不被乎正朔莫不駿奔稽顙委質重譯于時見鼓威惠無思不服苑戲九尾之禽園樓三足之鳥鳴鳳在林駭於黃帝之園有龍游淵盈於孔甲之沼萬物煙燭天地交泰義懷靡內化感無外林無被褐山無韋帶皆象刻於百工兆發乎靈蔡締紳濟濟軒冕萬萬功與造化爭流德與二儀比大言未終公子慨然而興曰鄙夫固陋守茲狂狷蓋理有毀之而爭寶之訟解言有怒之而齊王之疾痊何子誘我以聾耳之樂棲我以蔀家之屋田游馳蕩利刃駿足既老氏之攸戒非吾人之所欲故靡得而應子至聞皇風載建時聖道淳卑實爲秋摘藻爲春下有可封之人上有大哉之君余雖不敏請從後塵

感士不遇賦

陶潛

昔董仲舒作士不遇賦司馬子長又爲之余書以三餘之日講習之暇讀其文慨然惆悵夫履信思順生人之善行抱朴守靜君子之篤素自眞風告逝大偽斯興閭閻懈退之節市朝驅易進之心懷正志道之士或潛玉于當年潔已清操之人或沒世以徒勤故夷皓有安歸之歎三閭發已矣之哀悲夫寓形百年而瞬息已盡立行之難而一城莫賞此古人所以染翰慷慨屢抑而不能已者也夫導達意氣其惟文乎撫卷躊躇遂感而賦之

吞大塊之受氣何斯人之獨靈稟神智以藏照秉三五而垂名或擊壤以自歡或大濟于蒼生靡潛躍之非分常傲然以稱情世流浪而遂徂物羣分以相形密網裁而魚駭宏羅制而鳥驚彼達人之善覺乃逃

祿而歸耕山嶷嶷而懷影川汪汪而藏聲望軒堂而永歎甘貧賤以辭榮淳源汨以長分美惡作以異途原百行之攸貴莫爲善之可娛奉上天之成命師聖人之遺書發忠孝于君親生信義于鄉閭推誠心而復顯不矯然而所慕嗟乎雷同而無猜卒蒙恥以受謗者謂迷直道者云妄坦至公而無猜卒蒙恥以受謗雖懷瑾而握蘭徒芳潔而誰亮哀哉士之不遇已不在炎帝魁之世獨祇修以自勸豈三省之或廢庶進德以及時時既至而不惠無愛生之晤言念張季之終蔽愍馮叟子郎署賴魏守以納計雖僅言于必知亦苦心而曠歲矧夫市之無虎眩三夫之獻說悼賈傳之秀朗紆遠轡于促界悲董相之淵致屢乘危而幸濟感哲人之無偶淚淋漓以灑袂承前王之清誨曰天道之無親澄得一以作鑒恆輔善而佐仁夷投老以長飢回早夭而又貧傷請車以備梓悲茹薇而殞身雖好學與行義何死生之苦辛疑報德之若茲懼斯言之虛陳何曠世之無才罕無路之不遘伊古人之慷慨病奇名之不立廣結髮以從政不愧賞於萬邑屈雄志於戚豎竟尺土之莫及雷誠信於身後動衆人之悲泣商畫規以拯弊言始順而思入奚良辰之易傾胡害勝其乃急奮憂遐緬人事無已有感有味嗜測其理寧固窮以濟意不委曲而累已既軒冕之非榮豈緼袍之爲恥誠謬會以取拙且欣然而歸止擁孤襟以畢歲謝良價于朝市

感知己賦

梁陸倕

夜申旦而不寐獨匡坐而怨咨命僕夫而風駕指南館而爲期學窮書府文究辭林既耳聞而存口又目

見而登心似臨淵之借書類東武之飛輪軫工遲於長卿踰巧速於王粲固乃度平子而越孟堅何論孔璋而與公幹或欲涉其涯俟求其界畔則浩浩港港彪彪泝泝譬長缺於鞘中若龍淵與蜀漢濟濟冠蓋祁祁偶逸有竊風以味道咸交臂而屈膝或望路以窺門空升堂而入室彼春蘭及秋菊尚蕪絕於衆芳矧重仁與襲義信遠遼今未央言追憶而不逮辭欲盡而復忘竊仰高而希驥忽脂車而秣馬既一顧之我隆亦東壁之余假似延州之如舊同伯嗜之倒屣附蒼蠅於驥尾託明鏡于朝光謂虛無而爲有布籍甚于游揚於是柔條颯其成勁白露變而爲霜歲忽忽而適盡憂與愛今未忘聚落莖于虛室聽鶉雀于枯楊怵懍懍其雖語獨撫抱而增傷託異人以獨憂賴奇文而愈疾索黃瓊之寄居造安仁之狹室車出門其已歎無論銜格與促膝譬鄒子之驗松故未寒而能懷徒納壤以作高陋吞舟而爲網值墨子之愛兼逢太丘之道廣部九萬以齊征激三千而同上識公沙於杵臼拔孝相于無名非夫人之爲感孰云感于余情指北邙以作誓期鬱鬱于佳城

惜士不遇賦

明伍瑞隆

古人之出處也由己今人之出處也由人由人者招之則來麾之則去由己者無心於功名道可進則進可退則退其實非由己也由道也孔子日用之則行舍之則藏又曰邦有道貧且賤焉恥也邦無道富且貴焉恥也豈非由己由道之明訓哉惟其間有遇不遇存焉惟人之用舍世之理亂同一感恩也而大小異一知己也而淺深異當時孔子

非不攝行相事孟子非不爲卿而要不可以爲遇也自肅皇帝始致辨於王皇二字之義尊之爲師而至聖大賢始一遇於千古之下耳夫遇者非由智非由力非由期約非由揣摩而忽然遇之之謂易曰遇主於巷又曰過其祖遇其妣不及其君遇其臣此遇之義也古人之行不一矣或出或處或默或語豈不亦紛然其轍哉而其間高爵厚祿未必賢一命不沾未必不肖遇者一言之義亦可容於暴主之朝不遇者全行之瑜而不免棄於聖人之世故或以大德而制於小德或以長才而困于短才或以經濟而屈於技能或以文章而劣于佞幸或以廉謹而棄於多慾或以高聞而擯於喧囂此在天則爲時在人則爲命馮唐李廣兩無可爭當是之時規不必圓矩不必方準不必平繩不必直吉凶悔吝懸於奸邪貪小之手自非有至人者揭日月而行將萬古如長夜耳伯夷柳下惠百世之師也而使不遇仲尼則不過東魯之逐臣與西山之餓殍此卞和所以抱泣而務光所以沉淵也太史公曰伯夷叔齊雖賢得夫子而名益彰顏淵雖篤學附驥尾而行益顯天地相遇品物咸章也姤之時義大矣哉董仲舒儒者所爲士不遇賦哀思傷毒司馬遷繼爲悲士不遇賦陶潛又爲感士不遇賦千古悲涼倡和欲絕予生也晚無三子之才而浮於三子之遇因援筆而續其篇使後之君子鑒予之志哀予之命而因以弔三子之魂云爾賦曰

噫惜乎傷心哉士之不遇若涉川之無舟若遠行之

失路欲進不可欲退不能望河山而隕涕弔風物而傷神況安危之靡定屬貧賤而無親譬在鳥而爲鳳超丹穴而高飛却掩九苞而自晦與鳥雀而同歸譬在器而爲琴張金玉而迴軫却寂莫乎朱絲繼秦箏之擊引譬在馬而爲駿輕千里之行塵却不達於伯樂服鹽車而苦辛譬在龍而爲惕恨進修之未能却德業之方成屬躍飛之屢更譬在衣而爲領單襟帶以無餘却值網維之廢空存懷袖之書譬在水而爲海挹百川而會歸却要荒而見棄藏蛟龍而莫知譬在山而爲岱恣七十君之迭主却一謝於秦皇末難期於漢武譬在金而爲鏤發千鎰之雄鋒却埋光於豐獄空流影於長虹譬在土而爲石互五岳而骨起却守其經綬之節莫顯其巖巖之理譬在草而爲蘭遡秋風而獨遠却閉阿嬌於長門而謝陳王於秋阪譬在水而爲松歷隆寒而不凋却一落乎淵底誰引手於青霄譬在氣而爲風洗天門於九重却闔闔之深閉扇靈陰於四封譬在室而爲棟抗一木而支厦詎炎炎之將頽致隆隆之挽下譬在樹而爲果剝方窮而復新却失與於君子反得廬於小人譬在筆而爲毫寫鬚眉於影響却墨海之無波絕兔鋒之蕭爽譬在體而爲眼攝一身之光明却浮雲之蔽日望長安而涕零登蒼天而高舉今乘衆氣而徜徉一覽而知山河之本末再覽而周天地之圓方彼帝皇王伯之各有所師今豈日月星辰之靡有所將不降其志今不辱其身夷齊以還分更屬何人悲哉連與惠之中倫中慮幸哉虞與逸之中權中清仕止久速不可以預期今往復平陂不可以力爭掩雲霞於天路吸

沆瀣於瑤京諒斯人之飛舉豈僕病而未能擁四色之蓮花列七重之寶樹吾未適乎伊人豈宵行而畏露神龍之在九淵兮埃風雲之推轂黃鶴高舉於千里兮詎無心於擇木常魚之服非白龍之可襲兮維縣之鐘鼓非爰居之所飲吾將建明月之旗接回風之軫而息乎若木之陰

懷賢賦

有序

郭棻

余壬子冬偕張伯鄰赴試南省道出長沙昔漢賈太傅左遷其地感堅馬而歎歎竟賦鵬以淪逝遊者輒增慨焉夫太傅弱冠抗疏漢廷其通才朗識直氣雄文當時碩儒未之能儼洵一代之豪賢哉追慕高風用綴賦言

維困敦之陽月兮余北征而溯長沙乘流風以鼓機兮懷往躅而咨嗟繫太傅之懿美兮天界之以修能抱貞白而不阿兮遭蒙霧而紫噴棄赤電驟耳而弗馭兮謂款段之猶龍光陳詞於未央兮竟出傳於藩封澹容與而去國兮寒胡爲乎中路心愴愴而蘊結兮情依依而回顧披楚氛而不敢怨兮念宣室而不能忘弔靈均於汨羅兮歌離騷而傍徨濯湘水以自潔兮紉秋蘭之芬芳荷心曲之無瑕兮雖殞瘁其何傷噫嘻薰猶混臭兮松蘿倒植土鼓雷鳴兮天球若磔斐貝錦兮廉貞屏斥醜正爲邪兮緣曲詆直自古皆有此兮豈先生之獨盡是故比干剖心仲尼削迹子奇履霜莠弘血碧虞卿窮愁韓非憤戚伍員投淵申徒抱石或幽繫于南冠或遭別於荆壁或三黜而不同或一言而輒叱美固惡其獨擅兮名不可以早揚誠知前轍之搖飢兮又不能笑梯滑稽與世而

徜徉燦予心於皎日兮未改此度鳳翩翾其高舉兮豈下羣乎雞鶩歲駭駭其飄逝兮途歷歷其紆長遠紫闥而覲位扈兮恐多岐而忘羊嫫女妒其蛾眉兮固恆態也懷瑾握瑜而見擯兮又何怪也瞻帝閭以長顧兮知丹衷之不能諶悼先生之環特兮迺長籌而短算綰予棹以裴徊兮心佗僚而悲思氣鬱結而不可平兮緬流風而薦辭

欽定古今圖書集成明倫彙編人事典

第八十卷目錄

遇合部藝文四 詩詞

邨風北門三章

飯牛歌

龜山操

息鄴操

檠操

猗蘭操

去魯歌

臨河歎

楚聘歌

丘陵歌

侑詩

與春申君書後賦

琴思楚歌

見志詩 二首

豫章行

琴歌

贈母丘儉

贈母丘荊州

答杜曄

贈山濤

鞠歌行 有序

詠史詩 二首

雜詩

擬古 二首

周甯戚

孔子

同前

同前

同前

同前

同前

同前

同前

荀卿

前人

漢王逸

鄺炎

魏曹植

阮瑀

杜曄

前人

毋丘儉

晉司馬彪

陸機

左思

張協

宋鮑照

種蘭

擬左記室思詠史

初至壽春作

示程伯達

牆上難爲題

東征歌

重酬范郎中 并序

寄荊州張丞相

書情獻相公

放歌行

歲暮歸南山

古風 四首

贈范金卿

奉贈韋丈左丞二十二韻

遣興

述古

短歌行贈王郎司直

寄狄明府

君不見簡蘇侯

投簡成華兩縣諸子

可歎

緩歌行

懷哉行

古興

送綦毋潛

辭房相公

雜體

袁淑

梁江淹

吳均

北魏胡叟

北周王褒

隋王通

唐王維

前人

嚴維

王昌齡

孟浩然

李白

前人

杜甫

前人

前人

前人

前人

前人

前人

前人

李頎

薛據

前人

盧象

張偁

韋應物

贈康洽

失意歸吳因寄東臺劉侍郎

致酒行

將歸故山留別杜侍郎

感興

送王明善 有序

沁園春 夢方孚若

遇合部紀事

明高岱

俞允文

明劉潛夫

李端

孟郊

李賀

王建

人事典第八十卷

遇合部藝文四 詩詞

邨風北門三章

衛之賢者處亂世事暗君不得其志故因出北門而賦以自比

出自北門憂心殷殷終窶且貧莫知我艱已焉哉天實爲之謂之何哉

王事適我政事一埤益我我入自外室人交徧譏我已焉哉天實爲之謂之何哉

王事敦我政事一埤遺我我入自外室人交徧摧我已焉哉天實爲之謂之何哉

飯牛歌

淮南子曰甯戚欲干齊桓公困窮無以自達於是爲商旅將任車以商於齊暮宿於郭門外桓公郊迎客夜開門辟任車爇火甚衆越飯牛車下擊牛角而疾商歌桓公聞之曰異哉非常人也令後車載之因授以政蝸笑外稿云此歌不類春秋時人語蓋後世所擬者高誘註呂氏春秋謂戚所歌乃

周甯戚

遇合部紀事

遇合部紀事

遇合部紀事

遇合部紀事

遇合部紀事

遇合部紀事

詩碩鼠之辭雖未見所據亦可見南山白石之歌
誘初未之見也然其辭亦激烈足以動人

南山矸白石爛生不逢堯與舜禪短布單衣適至軒
從昏飯牛薄夜半長夜漫漫何時旦

滄浪之水白石粲中有鯉魚長尺半弊布單衣裁至
飢清朝飯牛至夜半黃犢上阪且休息吾將拾汝相
齊國

又劉向別錄所載

出東門兮厲石斑上有松柏青且闌羅布衣兮縵縵
時不遇兮堯舜主牛兮努力食細草大臣在爾側吾
當與爾適楚國

龜山操

孔子

琴操曰季桓子受齊女樂孔子欲諫不得退而望
魯龜山作此曲以喻季氏之蔽魯也

予欲望魯兮龜山蔽之手無斧柯奈龜山何

息鄒操

同前

孔叢子曰趙簡子使聘夫子將至焉及河聞鳴犢
趙犢之見殺也迴輿而旋之衛息鄒爲操云云家
語曰還息於鄒作樂琴以哀之即此歌也

周道衰微禮樂陵遲文武既墜吾將焉歸周遊天下
靡邦可依鳳鳥不識珍寶梟鴞眷然顧之慘然心悲

中車命駕將適唐都黃河洋洋攸攸之魚臨津不濟
還轅息鄒傷予道窮哀彼無辜踟翔于衛復我舊廬
從吾所好其樂只且

樂操

同前

事與前同又名息鄒操

竭澤而漁蛟龍不遊覆巢毀卵鳳不翔留慘予心悲

還轅息鄒

荷蘭操

同前

琴操曰孔子歷聘諸侯諸侯莫能任自衛反魯隱
谷之中見薊蘭獨茂喟然嘆曰蘭當爲王者香今
乃與衆草爲伍止車援琴歌之自傷不逢時託辭
於蘭云

習習谷風以陰以雨之子于歸遠送于野何彼蒼天
不得其所道遙九州無所定處時人闇蔽不知賢者
年紀逝邁一身將老

去魯歌

同前

史記曰孔子相魯齊人遺女樂季桓子受之三日
不聽政郊又不致膳俎於大夫孔子遂行宿乎屯
而師己送曰夫子則非罪孔子曰吾歌可夫歌云
云桓子聞之曰夫子罪我以羣婢故也

彼婦之口可以出走彼婦之譏可以死敗優哉游哉
維以卒歲

臨河歎

同前

孔子適晉臨河不濟歎而作歌
秋水衍兮風揚波舟楫顛倒更相加歸來歸來胡爲
斯

楚聘歌

同前

孔叢子曰楚王使使奉金幣聘夫子宰予冉有曰
夫子之道至是行矣遂請見問曰太公勤身苦志
八十而遇文王孰與許由之賢乎曰許由獨善其
身者也太公兼利天下者也然今世無文王雖有
太公孰能識之乃歌曰

大道隱兮禮爲基賢人竄兮將待時天下如一分欲

何之

丘陵歌

同前

孔叢子曰哀公使以幣如衛迎夫子而不能實用
也故夫子作丘陵之歌
登彼丘陵崩摧其阪仁道在邇求之若遠遂迷不復
自嬰屯蹇喟然迴慮題彼泰山鬱確其高梁甫迴連
枳棘充路陟之無緣將伐無柯患茲蔓延惟以末歎
涕貫渥渥

僂詩

荀卿

僂詩者荀卿子之所作也或曰荀卿既爲蘭陵令
客有說春申君者曰湯以亳武王以鎬皆有天下
今荀子賢而君借以百里之勢臣爲君危之春申
君乃謝荀子荀子去之趙人又說春申君曰昔伊
尹去夏入殷殷王而夏亡管仲去魯入齊魯弱而
齊彊賢者所在其君未嘗不尊榮也今荀子天下
賢士君何爲謝之春申君又使人請荀子荀子不
還而遺之賦即此僂詩也

天下不治請陳僂詩天地易位四時易鄉列星墜
旦暮晦盲幽暗登昭日月下藏公正無私反見縱橫
志愛公利重樓疏堂無私罪人懲革二兵道德純備
讒口將將仁人細約教暴擅強天下幽險恐失世英
螭龍爲蜺蜺鳴泉爲鳳凰比干見刳孔子拘匡昭昭
乎其知之明也郁郁乎其遇時之不祥也拂乎其欲
禮義之大行也闕乎天下之晦盲也時天不復憂無
疆也千秋必反古之常也弟子勉學天不忘也聖人
共手時幾將矣與愚亦疑願聞反辭其少歌也念彼
遠方何其塞矣仁人細約暴人衍矣忠臣危殆讒人

般矣璇玉瑤珠不知佩也維布與錦不知異也閭姬子奢莫之媒也嫫母刀父是之喜也以盲爲明以聵爲聰以危爲安以吉爲凶嗚呼上天曷維其同

與春申君書後賦數小異

前人

寶珍隨珠不知俾今稔衣與絲不知異今閭姝子奢莫知媒今嫫母求之又甚喜今以聵爲明以聵爲聰以是爲非以吉爲凶嗚呼上天曷謂其同

琴思楚歌

漢王逸

盛陰修夜何難曉思念糾戾腸摧繞時節晚莫年齒老冬夏更運去若頽寒來暑往難逐追形容減少顏色虧時忽晚曉若驚馳意中私喜施用爲內無所恃失本義志願不得心肝沸憂懷感結重嘆噫歲月已盡去奄忽亡官失祿去家室思想君命幸復位久處無成卒放棄

見志詩二首

鄺炎

大道夷且長窘路狹且促修翼無卑棲遠趾不步局舒吾凌霄羽奮此千里足超邁絕塵驅倏忽誰能逐賢愚豈常類稟性在清濁富貴有人藉貧賤無天祿通塞苟由己志士不相干陳平敖里社韓信釣河曲終居天下宰食此萬鍾祿德音流千載功名重山嶽靈芝生河洲動搖因洪波蘭榮一何晚嚴霜瘁其柯哀哉二芳草不植泰山阿文質道所貴遺時用有嘉絳灌臨衡宰謂說崇浮華賢才抑不用遠投荆南沙抱玉乘龍驥不逢樂與安得孔仲尼爲世陳四科

豫章行

魏曹植

窮達難豫圖禍福信亦然虞舜不逢堯耕耘處中田太公未遭文漁釣終渭川不見魯孔丘窮困陳蔡間

周公下白屋天下稱其賢

琴歌

阮瑀

魏書曰太祖雅聞瑀名辟之不應乃逃入山中太祖使人焚山得瑀太祖時征長安大延賓客怒瑀不與語使就技人列瑀善解音能鼓琴撫絃而歌爲曲既捷音聲殊妙太祖大悅

奕奕天門開大魏應期運青蓋巡九州在東西人怨士爲知己死女爲悅者玩恩義荷潛暢他人焉能亂

贈母丘儉

杜華

文章叙錄曰擊與母丘儉鄉里相親故爲詩與儉求仙人藥一丸欲以相感切儉求助也儉答以詩然擊竟不得遷卒于祕書

騏驥馬不試婆娑槽櫪間壯士志未伸坎軻多辛酸伊擊爲騰臣呂望身操竿夷吾困商販甯戚對牛歎食其處監門淮陰飢不餐買臣老負薪妻叛呼不還釋之官十年位不增故官才非八子倫而與齊其患無知不在此哀豈未有言彼此萬病久榮衛動不安聞有韓梁葉信來給一丸

贈母丘荊州

前人

鵠飛舉萬里一飛翮吳蒼翮高志難得離鴻失所望

答杜華

母丘儉

鳳鳥翔京邑哀鳴有所思才爲聖世出德音何不怡八子未際遇今者遭明時胡康出隴畝楊偉無根基飛騰冲雲天奮迅協光熙駿驥骨法異伯樂觀知之但當養羽翮鴻舉必有期體無纖微疾安用問良醫聯翩輕捷還爲燕雀嗤韓梁葉雖良恐便不能治悠悠千里情薄言答嘉詩信心感諸中賞不在辭

贈山濤

晉司馬彪

蒼苔椅桐樹寄生於南岳上凌霄雲霓下臨千仞谷處身孤且危於何託余足昔也植朝陽傾枝俟鸞鷟今世絕世用倥傯見迫束班匠不我顧牙曠不我錄焉得成琴瑟何由揚妙曲冉冉二光馳逝者一何速中夜不能寐撫劍起躑躅感彼孔聖歎哀此年命促卞和潛幽冥誰能證奇璞冀願神龍來揚光以見燭

鞠歌行

有序

陸機

序曰按漢宮閣有含章鞠室靈芝鞠室後漢馬防第七子臨道連閣通池鞠城彌於街路鞠歌將謂此也又東阿王詩連騎擊壤或謂楚鞠乎二言七言雖奇實名器不遇知己終不見重願逢知己以託意焉

朝雲升應龍攀乘風遠遊騰雲瑞鼓鐘歇豈自歡念絃高張思和彈時希值年風愈循己雖易人知難王陽登賁公歡罕生既沒國千嘆嗟千載豈虛言邈矣遠念情愴然

詠史詩二首

左思

主父宦不達恩肉還相薄買臣因樵採伉儷不安宅陳平無產業歸來窮賈郭長卿還成都壁立何寥廓四賢豈不倖遭烈光篇籍當其未遇時憂在填溝壑英雄有迫遘由來自古昔何世無奇才遺之在草澤

又

習習籠中鳥舉翮觸四隅落落窮巷士抱影守空廬出門無道路枳棘塞中途計策棄不收塊若枯池魚外望無寸祿內顧無斗儲親戚還相蔑朋友日夜疎蘇秦北游說李斯西上書俛仰生榮華咄嗟復彫枯